

दिनांक 12.06.2024

समय: 18.45 बजे

आकाशवाणी जयपुर-अजमेर

प्रादेशिक समाचार

- उपराष्ट्रपति जगदीप धनखड़ काल जैसलमेर रा दो दिन रा दौरा सारू पधारेला।
- अठारहवीं लोकसभा रो पहलो सत्र 24 जून ऊं सरू व्हेला।
- मुख्यमंत्री भजन लाल शर्मा प्रदेश मांय शांति अर कानून व्यवस्था बणायी राखण ने राज्य सरकार री पहली प्राथमिकता बतायी।
- प्रदेश रा उत्तराद-आतूणी हलकां मांय तेज गर्मी ऊं जिन्दगी माथे असर पड़्यो-कोटा, भरतपुर, उदयपुर, अजमेर अर जयपुर संभाग मांय 14 ऊं 18 जून ताई कठे-कठे बारिश रा आसार।

000

उपराष्ट्रपति जगदीप धनखड़ रो काल अर 14 जून ने जैसलमेर रो दौरा करण रो कार्यक्रम है। वां रो काल तनोट माता मंदिर मांय दर्शन करण अर बीओपी बावलियांवाला रो दौरा कर र बी.एस.एफ. रा जवानां ने संबोधित करण रो कार्यक्रम है। उपराष्ट्रपति 14 जून ने जैसलमेर मांय बीएसएफ री 154 वीं बटालियन रा एक कार्यक्रम मांय सिरकत करेला।

00000

अठारहवीं लोकसभा रो पहलो सत्र ई महीना री 24 तारीख ने सरू व्हेला। ई सत्र मांय नुवा चुण र आया सदस्यां ने शपथ दिरायी जावेला अर लोकसभा अध्यक्ष रो चुणाव कर्यो जावेला। राज्यसभा रो सत्र ई महीना री 27 तारीख ने सरू व्हेला। संसद रो ओ सत्र आवता महीना री 3 तारीख ने पूरो व्हेला। संसदीय कार्य मंत्री किरें रिजिजू सोशल मीडिया पोस्ट रे जरिये आ जाणकारी दीनी। रिजिजू कह्यो के देश री एक सौ चालीस करोड़ जनता री उम्मीदां पूरी करण अर चर्चा सारू संसद आदर्श मंच है।

000

सड़क परिवहन अर राजमार्ग मंत्री नितिन गडकरी आज काम काज संभाल लीनो। ई मौके वे कह्यो के प्रधानमंत्री नरेन्द्र मोदी री अगुवाई मांय भारत विश्व स्तर रा अर नुवा बुनियादी ढांचा वाळो देश बणेला। अजय टमटा अर हर्ष मल्होत्रा ई सड़क परिवहन अर राजमार्ग राज्य मंत्री रो कामकाज संभाळ्यो। केंद्रीय मंत्री ज्योतिरादित्य सिंधिया अर केंद्रीय राज्य मंत्री वी. सोमन्ना ई कामकाज संभाळ लीनो। वित्त अर कॉर्पोरेट कार्य मंत्री निर्मला सीतारामन ई आज कामकाज संभाळ लीनो।

000

केंद्रीय मंत्री प्रल्हाद जोशी आज खाद्य अर सार्वजनिक वितरण विभाग रा अहलकारां सागे पहली मीटिंग कीनी। मीटिंग मांय मंत्रालय रा राज्य मंत्री बी.एल वर्मा अर नीमूबेन बमभानिया ई मौजूद रह्या। मीटिंग मांय खाद्य वितरण प्रक्रिया ने और मज़बूत बणावण बाबत् जरूरी रणनीति अर उपायां रा बारा मांय चर्चा करी ज्यी। जोशी जनता ने खाद्य सुरक्षा मुहैया करावणो तैय करण री प्रतिबद्धता दोहरायी।

000

मुख्यमंत्री भजनलाल शर्मा कह्यो है के प्रदेश मांय शांति अर कानून व्यवस्था बणायी राखण माथे राज्य सरकार रो खास ध्यान है। वे राजस्थान पुलिस स्थापना दिवस रा सिलसिला मांय आज जयपुर री राजस्थान पुलिस अकादमी मांय राखी ज्या राज्य स्तर रा जळसा मांय बोल रह्या हा। वे सगळा पुलिसवाळां ने स्थापना दिवस री बधाई देता थकां कर्तव्य पूरो करण रे दौरान शहीद व्ह्या वीर जवानां ने नमन कीनो। मुख्यमंत्री कह्यो के जनता री हिफाजत सारु राज्य सरकार लगातार केई मोटा फ़ैसला ले रही है, जिण ऊं अपराध रा आंकड़ां मांय गिरावट आयी है। वे कह्यो के राज्य सरकार पेपरलीक मामला मांय एसआईटी जांच, एंटी गैंगस्टर टास्क फोर्स बणावण, महिलावां अर दलितां रे खिलाफ अत्याचार ने कम करण समेत केई नीतिगत फ़ैसला लीना है जिण रा नतीजा सामी आ रह्या मुख्यमंत्री कह्यो के समय सागे अपराधां रा तरीका ई बदल रह्या है, ऐड़ा मांय राजस्थान पुलिस ई खुद ने लगातार आधुनिक बणा रही है। वे कह्यो के पुलिस बल ने आधुनिक हथियारां, फॉरेंसिक साइंस अर साइबर अपराध री रोकथाम सरीखी तकनीकां मांय दक्ष बणायो जा रह्यो है ताकि वे आवता बगत मांय आवण वाळी हर चुनौती रो सामो कर सके। मुख्यमंत्री ई मौके राजस्थान पुलिस कल्याण निधि सारु डोढ़ करोड़ रुप्या, राजस्थान पुलिस बेनेवलेन्ट फण्ड सारु 1 करोड़ रुप्या अर उत्सव फंड मांय 1 करोड़ रुप्या बधा र डोढ़ करोड़ रुप्या आवंटित करण रो ऐलाण ई कीनो। ई मौके पुलिस महानिदेशक यू आर साहू कह्यो के जनता रा दिमाग मांय पुलिस रो भरोसो अर कर्तव्यपरायणता ने और मजबूत बणावण मांय राजस्थान पुलिस कोई कोर कसर नी छोड़ेला। इण ऊं पैली मुख्यमंत्री पुलिस शहीद स्मारक माथे फूल चढ़ा र शहादत ने नमन कीनो। ई मौके मुख्यमंत्री बेहतरीन सेवा देवण सारु पुलिस वाळां ने पुलिस पदक ऊं नवाजा। प्रदेश रा दूजा जिलां मांय ई राजस्थान पुलिस रा स्थापना दिवस रा सिलसिला मांय कार्यक्रम राखी ज्या। बाड़मेर मांय पुलिस लाइन मांय राखी ज्या कार्यक्रम मांय पुलिस प्रदर्शनी लगायी ज्यी अर पौधा रोप र पर्यावरण संरक्षण रो संदेश दियो ज्यो। सराहनीय सेवा सारु पुलिस रा जवानां रो मान ई करी ज्यो। हनुमानगढ़ पुलिस लाइन मांय नशामुक्ति अर यातायात जागरुकता रा बारा मांय प्रदर्शनी लगायी ज्यी।

चित्तौड़गढ़ मांय राजस्थान पुलिस रा स्थापना दिवस रा सिलसिला मांय पुलिस लाइन मांय कार्यक्रम राखी ज्यो। ई 40 पुलिस वाळां रो बेहतरीन सेवा सारु मान करी ज्यो। चूरु मांय पुलिस स्थापना दिवस रा सिलसिला मांय पुलिस लाइन मांय जवान पौधा रोप र वां री देखभाळ री शपथ लीनी।

0000

नुवा बणायी ज्या तीन आपराधिक कानून एक जुलाई 2024 ऊं लागू व्हे जावेला। आं कानूनां रा बारा मांय जाणकारी देवण सारु आकाशवाणी समाचार जयपुर री ओर ऊं प्रादेशिक समाचार बुलेटिन मांय नुवी श्रृंखला चलायी जा रही है। नुवा कानूनां मांय आतंकवाद रे खिलाफ लड़ाई सारु ई करड़ा प्रावधान करी ज्या है। भारतीय न्याय संहिता, 2023 री धारा 113 न्यारा-न्यारा कृत्यां री रूपरेखा पेश करे है, जो आतंकवाद रो सृजन करे है, ज्यां मांय विस्फोटकां, घातक हथियारां, रसायनां या किण ई खतरनाक चीज रो उपयोग शामिल है।

ई दायरा मांय मृत्यु, चोट, संपत्ति ने नुकसान, ज़रूरी आपूर्ति मांय बाधा अर दूजी बातां शामिल है। ई रा तैत 'सार्वजनिक पदाधिकारी' शब्द ने मान्यता देवण रो प्रावधान है, जिण मांय संवैधानिक प्राधिकारियां अर केंद्र सरकार कानी ऊं अधिसूचित दूजा ओहदादार शामिल है। किण ई सार्वजनिक पदाधिकारी ने मौत रे घाट उतारण री कोशिश आतंकवाद रा दायरा मांय आवे है। सार्वजनिक सुविधावां या गैर सरकारी संपत्ति ने बम, डायनामाइट या दूजा विस्फोटक पदार्थां ऊं नष्ट करणो अब आतंकवादी गतिविधि रा तहत अपराध मान्यो जावेला। आतंकवादी कृत्यां सारु मौत री सजा या आजीवन कारावास रो प्रावधान है। नुवा कानून मांय वां कृत्यां ने ई शामिल करी ज्या है ज्यां रा परिणामस्वरूप किण ई दूजा देश मांय किण ई संपत्ति री क्षति अर विनाश व्हे है, जिण रो उपयोग भारत री रक्षा सारु कर्यो जावे है या भारत सरकार रा कामकाज रा संबंध मांय कर्यो जावे है, जिण ऊं अंतर्राष्ट्रीय आतंकवाद रा वैश्विक खतरा री बात पुष्ट व्हे है।

0000

राज्यपाल कलराज मिश्र पश्चिम क्षेत्र सांस्कृतिक केंद्र कानी ऊं राजस्थान समेत सदस्य राज्यां गुजरात, महाराष्ट्र, गोवा अर केन्द्र रा राज वाळा प्रदेश दमण, दीव अर दादरा नगर हवेली मांय कला अर कलाकारां ने बधावो देवण सारू बत्ता ऊं बत्ता कार्यक्रम करण रा हुकम दीना है। राज्यपाल रा हुकम पाछे सांस्कृतिक केन्द्र अब 156 री ठौड़ 200 ऊं बत्ता कार्यक्रम करवावेला। केंद्र री संचालन समिति री मीटिंग मांय ओ फैसलो करी ज्यो। राज्यपाल ग्रामीण कलाकारां ने बत्ता मौका देवण अर स्थानीय कला, धरोहर रा संरक्षण सारू ई काम करण री जरूरत बतायी। राज्यपाल आज वड़ोदरा मांय पश्चिम क्षेत्र सांस्कृतिक केन्द्र री संचालन समिति अर कार्यकारी समिति री वार्षिक मीटिंग मांय बोल रह्या हा। वे कह्यो के समाज रा सगळा तबकां ने जोड़ र वरिष्ठ अर युवा कला कार्यशालावां, कला प्रशिक्षण रा कार्यक्रम सुदूर गांव-ढाणियां मांय ई लगातार व्हेवणा चाहिजे। वे कह्यो के वो ई समाज संवदेनशील बण्यो रेहवे है जठे कला अर कलाकारां रो वास व्हे है।

00000

आज अंतर्राष्ट्रीय बाल श्रम निषेध दिवस मनायी ज्यो। ई मौके प्रदेश मांय बाल मजदूरी खत्म करण अर ई बारा मांय जाग जगावण सारू न्यारा-न्यारा कार्यक्रम राखी ज्या। केंद्रीय संचार ब्यूरो क्षेत्रीय कार्यालय सवाईमाधोपुर अर जिला विधिक सेवा प्राधिकरण री ओर ऊं कार्यक्रम राखी ज्यो। ई मौके बाल श्रम अधिनियम री जाणकारी देता थकां बाल श्रम ऊं व्हेवण वाळा नुकसाण रा बारा मांय बतायी ज्यो। पाली मांय ई राजस्थान राज्य विधिक सेवा प्राधिकरण कानी ऊं जनता मांय जाग जगावण सारू न्यारी-न्यारी ठौड़ां साक्षरता शिविर लगायी ज्या अर गांवां, ढाणियां, मोहल्लां मांय बाल श्रम रे खिलाफ जागरूकता शिविर लगायी ज्या।

00000

प्रदेश रा उत्तराद आतूणी हलकां मांय तेज गर्मी अर लू रे कारण जिन्दगी माथे असर पड़ रह्यो है। आं हलकां मांय अधिकतम तापमान 45 डिग्री सेल्सियस रे आरे-सारे दर्ज कर्यो जा रह्यो है। राजधानी जयपुर मांय ई पारो 44 डिग्री सेल्सियस रे आरे सारे दर्ज करी ज्यो। चूरू मांय आज जोरदार गर्मी ऊं लोग बेहाल रह्या। टोंक मांय संवारे ऊं तेज गर्मी रही, पण दोपहरां पाछे कठे-कठे हल्की बारिश या बूदाबांदी व्ही। मौसम विभाग आज अर काल कोटा अर उदयपुर संभाग मांय कठे-कठे बारिश रा आसार जताया है। जोधपुर अर बीकानेर संभाग मांय आवता तीन दिन कठे-कठे बारिश रा आसार है। विभाग रे मुजब 14 ऊं 18 जून ताई भरतपुर, जयपुर, कोटा, अजमेर अर उदयपुर संभाग मांय कठे-कठे बिरखा व्हे सके है।

0000